



საქართველოს გაერთიანებული სახელმწიფოს და სოფლის მეურნეობის მინისტრი

ბრძანება N 2-1034

30/10/2019

ქ. თბილისი

სიღნაღის მუნიციპალიტეტში, სოფ. ბოდბეში შპს „ენსისი 1701“-ს სამელიორაციო სისტემის მოწყობასა და ექსპლუატაციაზე სკრინინგის გადაწყვეტილების შესახებ

შპს „ენსისი 1701“-ს მიერ გზშ-ის ჩატარების საჭიროების დადგენის მიზნით საქართველოს გაერთიანებული სახელმწიფოს და სოფლის მეურნეობის მინისტროში წარმოდგენილია, სამელიორაციო სისტემის მოწყობისა და ექსპლუატაციის პროექტის სკრინინგის განცხადება.

წარმოდგენილი დოკუმენტაციით დგინდება, რომ შპს „ენსისი 1701“ გეგმავს სამელიორაციო სისტემის მოწყობას სიღნაღის მუნიციპალიტეტში, სოფ. ბოდბეში, ამავე კომპანიის საკუთრებაში არსებულ 129455 მ² (12.945 ჰა) და 4300000 მ² (430 ჰა) ფართობის მქონე სასოფლო-სამეურნეო დანიშნულების მიწის ნაკვეთებზე (ს/კ 56.10.70.088, 56.10.70.018), სადაც დაახლოებით 100 ჰა ფართობზე გაშენებულია ნუშის ბაღები. წყალაღება დაგეგმილია მდ. იორიდან, რომელიც სასოფლო-სამეურნეო სავარგულებიდან დაშორებულია დაახლოებით 400 მეტრით, ხოლო მიწის ნაკვეთის უახლოესი წერტილიდან დაახლოებით 50 მეტრით. წყალაღების ადგილის GPS კოორდინატებია: X – 563525.71; Y – 4579027.93. საპროექტო ტერიტორიის სიახლოვეს წარმოდგენილი არ არის დასახლებული პუნქტი.

ნუშის ბაღების მოსარწყავად დაგეგმილია წელიწადში 59591 მ³ მოცულობის წყლის გამოყენება. წყალაღება მოხდება წელიწადში 8 თვე, წყლის მაქსიმალური რაოდენობის (10588,3 მ³) აღება დაგეგმილია ივლისის და აგვისტოს თვეში. წყალაღებისთვის გამოყენებული იქნება დენის წყაროზე მომუშავე ტუმბო, რომლის ამოტუმბვის სიჩქარეა 140 მ³/სთ. პროექტით ასევე გათვალისწინებულია 700 მ³ მოცულობის მქონე მიწისზედა წყალშემკრები რეზერვუარის მოწყობა, რომელიც 1,5 კმ სიგრძის, 250 მმ დიამეტრის მქონე მილების საშუალებით მიერთებული იქნება ტუმბოსთან. რეზერვუარში დაგროვილი წყლით მოხდება სავარგულების წვეთოვანი სისტემით მორწყვა.

მილების განთავსება დაგეგმილია მიწის ქვეშ, ტრანშეის სიგანე იქნება დაახლოებით 30 სმ, ხოლო სიღრმე დაახლოებით 40 სმ. მიწის სამუშაოების ჩატარების პერიოდში მოხდება ნიადაგის ნაყოფიერი ფენის დროებით დასაწყობება და მილების ჩაწყობის შემდეგ მოეწყობა უკუყრილი.

წარმოდგენილი ინფორმაციის თანახმად ნარჩენების წარმოქმნა არ არის მოსალოდნელი.

საქმიანობის სპეციფიკის გათვალისწინებით ატმოსფერულ ჰაერზე ზემოქმედებას ადგილი არ ექნება. ტუმბოს ხმაურის დონის და ობიექტიდან უახლოესი დასახლებული პუნქტის დაშორების გათვალისწინებით ხმაურით გამოწვეული ზემოქმედება არ იქნება მნიშვნელოვანი.

სკრინინგის განცხადების მიხედვით საპროექტო ტერიტორიაზე არ არის წარმოდგენილი კულტურული მემკვიდრეობის ძეგლები.

დაგეგმილი საქმიანობის ადგილმდებარეობის და სპეციფიკის გათვალისწინებით მნიშვნელოვანი ზემოქმედება ფაუნის წარმომადგენლებზე მოსალოდნელი არ არის.

წყალადების წერტილიდან დაახლოებით 1,1 კმ-ში მდებარეობს „ზურმუხტის ქსელის“ შეთავაზებული საიტი - „კოწახურა - GE0000051“, რომელზეც ზემოქმედება მოსალოდნელი არ არის. წყალადების წერტილი კვეთს სსიპ დაცული ტერიტორიების სააგენტოს მართვას დაქვემდებარებულ ტერიტორიას „იორის აღკვეთილს“, აღნიშნულთან დაკავშირებით შპს "ენსისი 1701"-მა განცხადებით მიმართა სსიპ დაცული ტერიტორიების სააგენტოს. შეთანხმების საფუძველზე შპს „ენსისი 1701“-ს (ტყითმოსარგებლეს) იორის აღკვეთილის ტერიტორიაზე მდებარე 115 მ² მიწის ფართობზე (ს/კ 56.10.70.070) მიენიჭა სპეციალური დანიშნულებით ტყითსარგებლობის უფლება, ხე-ტყის ჭრის უფლების გარეშე, 11 თვის და 20 დღის ვადით. (სსიპ დაცული ტერიტორიების სააგენტოს თავმჯდომარის ბრძანება N-ო 166 - 12.08.2019)

„გარემოსდაცვითი შეფასების კოდექსის“ მე-7 მუხლის მე-5 ნაწილის შესაბამისად, სკრინინგის განცხადება მიმდინარე წლის 25 სექტემბერს გამოქვეყნდა სამინისტროს ოფიციალურ ვებგვერდზე და სიღნაღის მუნიციპალიტეტის საინფორმაციო დაფაზე. საზოგადოების მხრიდან აღნიშნულ საქმიანობასთან დაკავშირებით შენიშვნები და მოსაზრებები არ ყოფილა წარმოდგენილი.

საქმიანობის სპეციფიკიდან გამომდინარე, სამელიორაციო სისტემის მოწყობა და ექსპლუატაცია გარემოზე მნიშვნელოვან ზემოქმედებას არ გამოიწვევს, თუ უზრუნველყოფილი იქნება „გარემოსდაცვითი შეფასების კოდექსის“ მე-7 მუხლის მე-8 ნაწილის შესაბამისად გარემოსდაცვითი ტექნიკური რეგლამენტით დადგენილი მოთხოვნების, გარემოსდაცვითი ნორმების და სსიპ დაცული ტერიტორიების სააგენტოსთან შეთანხმებით გათვალისწინებული პირობების დაცვა.

ზემოაღნიშნული კრიტერიუმების გათვალისწინებით, „გარემოსდაცვითი შეფასების კოდექსი“-ს მე-7 მუხლის მე-6 ნაწილის საფუძველზე

ვ ბ რ ძ ა ნ ე ბ:

1. მიღებულ იქნეს სკრინინგის გადაწყვეტილება, სიღნაღის მუნიციპალიტეტში, სოფ. ბოდბეში შპს „ენსისი 1701“-ს სამელიორაციო სისტემის მოწყობა და ექსპლუატაცია არ დაექვემდებაროს გარემოზე ზემოქმედების შეფასებას;
2. შპს „ენსისი 1701“ ვალდებულია „გარემოსდაცვითი შეფასების კოდექსის“ მე-7 მუხლის მე-8 ნაწილის შესაბამისად უზრუნველყოს გარემოსდაცვითი ტექნიკური რეგლამენტით დადგენილი მოთხოვნებისა და გარემოსდაცვითი ნორმების დაცვა;
3. ბრძანება დაუყოვნებლივ გაეგზავნოს შპს „ენსისი 1701“-ს;
4. ბრძანება ძალაში შევიდეს შპს „ენსისი 1701“-ს მიერ ამ ბრძანების გაცნობისთანავე;
5. სკრინინგის გადაწყვეტილების გაცემიდან 5 დღის ვადაში სკრინინგის გადაწყვეტილება განთავსდეს სამინისტროს ოფიციალურ ვებგვერდზე და სიღნაღის მუნიციპალიტეტის აღმასრულებელი ან/და წარმომადგენლობითი ორგანოს საინფორმაციო დაფაზე;
6. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-12 კმ. N6) მხარის მიერ მისი ოფიციალური წესით გაცნობის დღიდან ერთი თვის ვადაში.

ლევან დავითაშვილი



მინისტრი